

遼東三家集

鹿萃齋詩文

賦集

孟錫珏題

三家合集序

懷德榮可民鹿茸齋詩文遼陽房仲南隅夢草堂詩草
新民劉東閣看雲聽濤館詩社宇戶部合刻爲三家集
丐序於余嘗考古人詩文如竇氏聯珠汝陰唱和或棣
萼齊名或苔岑合契都爲一集各有千秋非江湖集刻
於書棚玉石混淆蘭艾雜還所可同年而語也今觀三
君子英儒瞻聞皆所謂琢玉工射鵰手舉凡堆垛仗窘
材料費搜索少變化之病一洗而空之可民爲社宇哲
兄嘗從受學所爲文才思發越規矩備具而能超出於
規矩之外尤爲卓不可跂遼瀋文獻三家其巨擘矣乎

鍾羲年衰材劣不足涉津涯而窺潭奧其洪筆麗藻讀者當自得之太歲在著雍執徐冬十一月留垞居士楊鍾羲序

榮公可民私謚惠敏先生小傳

滿洲景

賢

仰山

公諱文達字可民系出榮公先世居山東文登縣乾隆初移居奉天金州咸豐十年又隨公父移居昌圖屬境今析為懷德縣治誕時公母夢紅蛇盤於牀大逾車輪驚寤而公生公生而岐異聰穎殊常兒塾師不能授以課就學於七百里外遼陽王燮臣先生公之父執也彼時家綦貧王奇公才不受束脩然往返川資動虞不給以乞食為常年十五迫於家境為村塾師十九昌圖初設廳治請學額廳試張芷生司馬得公卷大奇之覆試日親監公日未移晷不草而就通幅加濃墨是日天寒

雨雪公衣薄脫狐裘覆公身曰吾為國家得真才矣遂
冠一軍府試受知於蔣和叔先生院試受知於張霽亭
先生經古諸作傳鈔殆遍洛陽之紙為之一貴癸酉科
選拔十試於鄉癸巳始中副車居都門每試金臺書院
輒列前茅故累試報罷而名動京師南方學者咸重之
吾鄉同時與公齊名者為遼陽房仲南新民劉東閣人
稱為遼東三才子識者首為公屈一指焉公於經史詩
文書畫諸學無所不窺皆能溯本窮源深造有得從公
受業者得公之緒餘多破壁飛去尤篤於友愛兄弟六
人公居長親課諸弟四弟文昭補弟子員季弟文祚舉

於鄉皆公教也少任俠慕朱家郭解之為人弱冠與遼陽董伯醇交始返求實踐以宋儒為宗嘗曰聖人首重知恥人禽之判只此而已性和易待人以誠不逆詐不億不信犯而不校謹守道學範圍不敢蕩踰一步而不修邊幅疎懶成性髮經月不櫛面數日不盥敝衣汗垢屢踵絕而束以繩遨遊於名公鉅卿文人學士之中坦然自若然狷介自持蒙藩之贈裘崇文山相國胡少宗伯之招致皆婉謝之終身處困出處進退必準於義理謂非足於中無待於外者歟癸卯受大吏聘為奉天大學堂總教習五月疾發卒於旅次年五十有六嗚呼公

亡已十有四年矣著作强半散佚盡尤罕見手書友人
尚有存者亦不易得年湮代遠吾鄉將有不識公姓名
者矣公之學問品行為吾鄉山斗鄉有人焉竟泯沒不
傳俾後世無所稱是吾鄉之過也余與公交最久知最
深余嘗歎曰生平知己可民一人而已撰述以存公非
余之責其誰耶祇以公生平事迹知之不詳且年老才
盡不足闡發君子之光每念公交遊最廣必有不忍公
之泯沒者乃遲之數年公之軼事既不可得余復衰老
日甚誠恐天不我假常留此憾於無窮也爰不辭謏陋
追憶昔年酒闌燈爇之餘公自談述者畧紀其梗概云

贊曰學邃於古窮源溯本愛汎於衆人益已損邊幅不
修大德自謹望重山斗名高奉審士論鄉評謚曰惠敏

榮可民先生墓誌銘

畢節葛 侁霞仙

戊午夏吾友祉宇自京師以書抵余曰先伯兄可民先生歿十有六年矣銘幽之文未具子其為我成之以光泉壤祉宇邃於古者也乃取不腆之文其果有說耶昔蘇穎濱銘其兄子瞻千古以為定論祉宇樹詞於可民墓次奚在非宜而必馳書於七千里外之故人於當世鉅人長者概弗快意余雖鈍誼何敢辭爰就景仰山所為先生小傳而加審焉先生諱文達字可民姓榮氏奉天懷德人世居山東文登縣至先生之父始遷懷德也先生幼敏束髮受書即能困難其師稍長豪於文以縣

試第一人補弟子員癸酉選拔貢京師復中癸巳順天鄉試副車落拓不偶晚年應當道之聘總教習東省大學堂道卒春秋五十六鄉人私謚曰惠敏先生其遊京師也課試屢壓其曹聲譽赫然公卿間諸公貴人執禮爭延先生卻焉崇相國胡少司馬其最知者也自余與祉宇莫逆交得見先生詩四章文一首驚歎竒絕不可企及乃知祉宇以著作雄海內其淵源自先生來孫師鄭選四朝詩錄先生及祉宇詩甚夥昆季濟義後先輝映嗚呼至矣先生性通脫不修邊幅然大節所關造次必即於禮少喜任俠聞董伯醇之言即潛心宋五子書

於載籍無所不窺惟探其旨要家貧苦不足收召後學
傳其業以資饘粥兀坐一編風雨寒暑手之不釋髮櫛
不可以月期面垢或數日忘洗衣敝履穿蕭然自適若
不知此身之有窘困遼東三才子推先生為首門下士
承其指授多騰達有開府秉節鉞者士論榮焉工書善
畫並世人得其片紙視為鳳毛麟角身後存者寥寥而
求之者愈急急衆其見重於世如此余不足以傳先生
又未接於生前親其言論丰采文至而情不至塞祉宇
之請且以增余之歉也先生兄弟六人仲文和字泰雲
先逝存四人季文祚即祉宇也曾王父玉彥王父俊父

唐華齋墓誌金
錫齡母時氏夢紅蛇大如車輪繞牀而生先生娶李氏
子二紹遠紹述女四葬西豐縣關門嘴子新塋有詩文
集若干卷行世銘曰

貧於學為艱越七百里求師而虔大業之成豈曰自天
嗚呼先生千秋萬歲名早定於志學之年銘詞質幽然
不然

按伯兄生於道光二十八年戊申十一月初七日
卒於光緒二十九年癸卯閏五月十三日初光緒
甲申以拔貢考取盛京宗室學漢教習三年期
滿引見以知縣分省試用或勸之仕慨然曰牧

令撫一邑民耳人苟存心濟物稱力而施安必以
令為哉丁酉扈倫招墾代貧苦戚里百餘戶謀居
處道途况瘁七載弗問家計卒以此致疾傷哉季

弟文祚附識

鹿茸齋總目錄

序

小傳

墓誌銘

文目錄

文

詩目錄

詩餘附

詩

賦目錄

賦